

Victor Cavegn Turitg

1935 - 2008



Suenter liunga e dolorusa malsogna supportada cun pazienza exemplarica, has Ti car frar astgau render Tia olma al Scaffider. Nus essan engrazievels per il bi temps che nus vein astgau guder ensemes cun Tei.

Victor ei naschius ils 13 da fevrer 1935 a Sedrun. Aunc cun quater frars e duas soras eis el carschius si el sempel ravugl d'ina familia purila ual sper baselgia da s. Vigeli a Sedrun. Victor fuva igl emprem affon dalla familia.

Ils geniturs ein stai Placi Cavegn e Victoria Cavegn, naschida Deragisch.

Suenter il temps d'affonza e las scolas obligatorias cheu a Tujetsch ha ei giu num pachetar la valischa e bandunar la cara mumma e fargliuns per serender giu la bassa cugl intent da fadigar il paun da mintgadi. Quei fuva la sort dad aunc biars e biaras ils quals sesentevan obligai da segidar cun la familia restonta. Tuttavia tgi che veva igl intent d'emprender in mistregn, fuva sfurzaus da bandunar nies vitg muntagnard e serender ella bassa. Las plazzas sco empredists fuvan da quels onns raras ellas muntognas e quei sin paucs secturs.

Demai ch'il bab Placi Cavegn ei morts gia igl onn 1949 eis ei buca stau in lev pass da prender cumiau dalla mumma e ses fargliuns e setrer naven.

Victor ei pia setratgs a Turitg. Gl'emprem ha el luvrau leu sco manual tier ina firma da construcziun. Buca ditg e Victor ha survegniu offeriu ina plaza sco emprendist da pictur. Quei mistregn ha el fatg cun plascher e finiu giu cun success. Per in cuort temps ha el, probabel suenter la recruta luvrau cheu a Sedrun. Mo gia spert eis el sedecidius da serender a Genevra per luvrar leu e probabel era per seperfecziunar el lungatg franzos.

Il domicil a Genevra ha buca cuzzau biars onns. Victor ei turnaus anavos el mar-

cau da Turitg. Cheu ha el spusau igl onn 1959 ils 30 da matg sia cara Florette Voegel la quala deriva digl Elsass e che el veva giu empriu d'enconuscher a Genevra.

Lur lètg ei vegnida benedida cun dus affons. Il fegl Eric e la feglia Elvira.

Suenter la maridaglia ei il trapassau buca staus culs mauns a calun. En numerus cuors dalla sera eis el sescolaus e sepreparaus per ils examens da meister-pictur. Quei pass ei lu reussius ad el stupert. Empau pli tard ha il Victor fundau ina atgna fatschenta da pictur. Quella ha el empalau entochen sur la vegliadetgna da pensiun ora.

Deplorablamein s'annunzia tier il trapassau gia igl onn 1995 ina malsogna maligna ed era in grev accident ha spossau il bien Victor malamein. Pliras malsognas han mudergiau el onns ora entochen ch'igl ei lu ils 2 da fenadur 2008 stau finiu cul pitir. Dieus ha liberau el dallas peinas dolorusas.

Il Victor ei era staus in premurau cantadur. En divers chors da Turitg ha el priu part, il davos en il chor baselgia, dalla parvenda da s. Giusep. Victor era zun respectaus ed ins carezava el el ravugl dils cantadurs. Quei ei semussau il di da sia sepultura. D'in tal diember da presents ein ins buca endisai tier ina sepultura ella bassa. Il chor ha schizun embelliu la sepultura cun in bellezia cant.

Sia gronda carezia valeva oravontut per ses affons sco era per siu biadi e las biadias che han fatg ad el bia lev oravontut duront sia malsogna. Ei fuvan per el il sulegl dalla veta, ch'el saveva buca ludar ed appreziar avunda.

Victor, Ti eis staus per nus sco il vegl dalla familia in bien exempel en tutt graus. Per tut quei che Ti has fatg per nus engraziein nus a Ti da tut cor. En nies intern ed en nies patratg vegnas Ti a restar a nus tutt en buna memoria.

Car Victor, ruaussa en paisch

Cun quella caschun lessel aunc engraziari a tut tgi che ha fatg dil bien pil de-funct Victor en sia veta, oravontut duront siu temps da malsogna. Quei cun visetas, telefons ni scrivers, sco era per las donaziuns en favur da Dr. Richner (Beatocello) e la finala per igl accumpagnament dil car Victor sin Siu davos viadi terrester.

Cordial engraziamenti.